

«Harry Potter» striuna puspè en noss kinos

In nov reschissur, in nov stil ed in Harry Potter ch'ins sto amar sco adina

DA CLAUDIA CADRUVI
E VIOLA PFEIFFER / ANR

■ **«Harry Potter ed il praschunier dad Askaban» è dapi l'emna passada en ils kinos svizzers. En quest film batta il giuven striun Harry cunter in luf-carstgaun (Werwolf) e cunter dementurs. Quai è creatiras orriblas. Ellas tettan la ventira ord la glieud. Cun il bitsch dals dementurs chastian ins ils pli sgarschavels malfatschents.** Ils dementurs surveglian uschiglio la praschun dad Askaban. Ma perquai ch'il renomà praschunier Sirius Black è mitschà dad Askaban, e perquai ch'ins suppona ch'il fugitiv veglia mazzar Harry, èn ils dementurs postads a Hogwarts. Hogwarts è l'internat dals striuns. Là va Harry a scola cun ses amis Hermine Granger e Ron Weasley.

Ina bestia da glina plaina

Durant il terz onn da scola scuvieran Harry e ses amis il misteri dal praschunier Sirius Black. El saja stà responsabel

per la mort dals geniturs da Harry, vegn ditg. La vardad è in'otra.

Misteris datti era en scola. Professer Lupin mussa a Harry co cumbatter dementurs. Ma Lupin n'è betg mo in striun amiaivel. El è in «animagus». Da glina plaina sa mida el en ina bestia, in luf-carstgaun. Anc auters han questa habilitad da sa transfurmar. Il rattun che Ron posseda n'è p. ex. era betg l'innocent animal da chasa sco quai ch'i fa la parita.

Memia vegl?

Ils giugadurs Daniel Radcliffe (Harry) e Rupert Grint (Ron) èn pli vegls che las persunas ch'els giogan. Harry e Ron han 13 onns e vessan d'esser giuvenils anc falmbers. Ils giugadurs da 15 u 16 onns han perencunter gia corps musculus. L'entschatta dal film croda quai en egl cunzunt tar ils schumellins Weasley ch'èn gia «lattunas».

Da l'autra vart èsi era interessant da guardar co ch'ils scolars èn sa sviluppads dapi l'ultim film. Neville Longbottom

(giugà da Matthew Lewis) era adina in pitschen grasslut. Uss è el lung e magher. Perquai n'è el betg exnum pli in-schignus. El stgarpitscha anc adina sur ses agens pes. Era Draco Malfoy (giugà da Tom Felton) è sa fatg um. Sia cumparsa è main gitta. Sia lingua cun intunaziun arroganta procura dentant per la «fiesadad» indispensabla per sia rolla.

Modern, cler, muntagnard

Cun Michael Gambon han ins chattà in bun successur per Richard Harris. Harris è mort, el aveva adina giugà il famus rector da Hogwarts, professer Albus Dumbledore. Bain occupada è era la pitschna rolla dal conductur dal bus «Fahreder Ritter».

Il nov reschissur Alfonso Cuarón ha chapì da midar l'atmosfera dal film, senza ch'i dess ina ruptura che disturbass. La vestgiadura è pli moderna. Ils emprims films dal reschissur englais Chris Columbus eran pli fustgs e sterics. Uss datti dapli glisch. Schizunt la cuntrada

enturn Hogwarts è sa midada. Las planiras èn svanidas. Igl è pli muntagnard. Ils scolars ston ascender taissas spundas per ir d'ina lecziun a l'autra.

Professer Severus Snape gioga auter sut il nov reschissur. El è anc adina nau-schira, ma main teatralic.

Donn è dentant che la gronda halla da festa na cumpara betg pli. Persuenter datti in portal monumental che vegn serrà cun sfragass impressiunant cura che Sirius Black s'avischina a la scola da Hogwarts.

Rasant

Tar ils effects speziels èsi da numnar la scena cun l'onda Magda. Ella vilenta Harry sin il peterpis. Il giuven striun fa stgufflar si sia onda fin ch'ella sa dauza en l'aria e sgola sco in ballon sur il quartier nua che Harry passenta sias vacanze.

Bler da rir dat era il viadi tras Londra cun il «Fahreder Ritter». Il giu da Quiditch, il ballape dals striuns, è dentant uschè rasant ch'ins sa dumonda, sch'ils as-

pectaturs che n'enconuschan betg ils emprims films, vegnan anc ordlonder.

Nua resta la satira?

Il film mussa betg tut quai ch'il cudesch raquinta. En il film manca cunzunt la satira. En il terz tom da Harry Potter prenda l'autura J. K. Rowling sin la corna l'entir moviment esoteric. Quai fa ella cun la figura Sybil Trelawney. En il film è la profetessa dentant be pli ina curiosa scolasta ch'instruescha co leger il fundatsch dal café.

A perder va era la filosofia davart il temp. Perquai na chapescha l'aspectatur il davos betg pertge che Hermine e Harry dastgan tuttenina struvegiar enavos il temp.

Malgrà la differenza tar il cudesch porscha il film tuttina bun divertiment. Per duas u trais uras pon ins sfundrar en in mund magic, po rir, bragir e tremblar cun striuns e cun striunessas che sa deportan a la fin dals quintes era mo sco carstgauns normals.



Harry Potter e Hermine Granger han schlià er questa giada tuts problems.



Sirius Black è stà responsabel per la mort dals geniturs da Harry, vegn ditg. La vardad è in'otra.

FOTOS MAD